

19 FEB 1998

Mahathir-Tiba

DR MAHATHIR TIBA DI KOTA KINABALU UNTUK LAWATAN DUA HARI

KOTA KINABALU, 19 Feb (Bernama) -- Perdana Menteri Datuk Seri Dr Mahathir Mohamad tiba di sini hari ini dari Brunei untuk lawatan dua hari.

Dr Mahathir, yang diiringi isterinya Datin Seri Dr Siti Hasmah Mohd Ali, tiba dengan pesawat khas pada pukul 9.27 pagi di terminal lama lapangan terbang antarabangsa di sini.

Ketua Menteri Datuk Yong Teck Lee dan Menteri Tanah dan Pembangunan Koperasi Datuk Osu Sukam, yang juga Ketua Perhubungan Umno Sabah, adalah di antara orang kenamaan negeri yang menyambut ketibaan beliau.

Dr Mahathir dijadual merasmikan Institut Kemajuan Ekonomi Anak Negeri pagi ini.

Beliau kemudian dijangka melawat tapak peranginan tepi laut Nexus Golf Resort di Karambunai, dekat sini sebelum menaiki helikopter ke Kudat untuk melakukan upacara pecah tanah tapak kilang besi Nusantara Steel Mill Sdn Bhd.

Pada sebelah malam, beliau akan menghadiri majlis kongsi raya bersama-sama pemimpin masyarakat sempena Aidilfitri dan Tahun Baru Cina di Pusat Perdagangan Sabah di Likas, dekat sini.

Esok, Dr Mahathir dijangka merasmikan Konvensyen Barisan Nasional negeri di Auditorium Yayasan Sabah dan kemudian menyertai Yang Dipertua Negeri Tun Sakaran Dandai menunaikan solat Jumaat di masjid negeri.

Dr Siti Hasmah pula mempunyai aturcara berasingan esok di mana beliau dijangka menemui pemimpin dan anggota Bakisa, Puspanita dan beberapa pertubuhan kebajikan pada dialog sambil bersarapan pagi.

Dr Mahathir dan isteri akan pulang ke ibu negara petang esok. --

BERNAMA

KG AKD